

•sawcuenh•

Gij Va Vuenyungz Hai Seiqlengq

幸福之花遍地开

□ Luz Vanjcinh / 陆婉珍

Seiq

Ndwenngoenz lumj daeuq, bi lai baez yaep da couh gvaqbae lo. Song bouxcoz couh yienghneix doxbang doxbaengh, caemh haemz caemh hoj, yied byaij yied gaenh. Ndaw reihnaz cungj ce miz haujlai gij angq riu songde.

Bet nyied cibhaj haemhhaenx, song boux de doxiu daengz laeng mbanj gwnzbya bae baiq ronghndwen.

Haeuj haemh, ronghndwen lumj raemx sawdikdik, songde ciuq fungsug Bouxcuengh dawz nyiedbingj, makbug, makbingzgoj daengj gijgwn baij youq gwnzndoengj, youh diemj dawz sam diuz yieng cap hwnj gwnz makbug bae, ndingq caz gingq laeuj……

Youq laj ronghndwen, songde dinghsim lwnh gojgaeq, dingq duz daekgaeuj yiengjvetvet, simmaez gij hom gocoengz, go'gveiq, gobatgag…… Mbouj rox mbouj nyinh couh daengz gyanghwnz lo.

Daegvang lau dabsau dwgliengz, couh duet buhrog bax hawj dabsau, yaek soengq de baema. Dabsau mup dawz gij feihdauh gwnzbuh Daegvang, najnyaenq lo, ndawsim raeujrubrub. De najhoengz dawz ok diuz saihwet saek lengj gyaundeiswhgeij, vaiqviet cug gyanghwet Daegvang bae. Saihwet neix dwg gij huq dinghcingz dah Yauzcuz, dabsau yungh haujlai seizgan cij damq baenz, aeu soengq hawj daegyox. Daegvang got dabsau gyaundeiswhgeij neix haeuj ndawrunj……

Neix aiq couhwdg “yienzfaenh ndei, mehmbwn dingh” luba. Daegmbauq Bouxcuengh Daegvang caeuq dah Yauzcuz gyaundeiswhgeij neix caen baenzranz lo!

Daegvang caeuq mehyah Yauzcuz doxgyaez doxgingq. Roek bi ndawde, sam boux lwgnyez couh laebdaeb doekseng lo. Ndawhongh iq, ciengzseiz cienz ok gij sing lwgnyez doxgyaep guhcaemz riuhehe, nauhyied dangqmaz.

Haj

Hoeng, gwnzmbwn rumz fwn nanz liuh. Siengj mbouj daengz youq ngoenz seizhah he, banringzgvaq, Daegvang hwnj bya gvat iengcoengz, bungq gwnzmbwn fwt bienq, fwjlaep cw mbwn, byajraez gvaq le, mbouj geij nanz couh doek fwnraq lo.

Mehyah de hawj lwg iq gwn cij le, gyaudaih gyabuz daiq ndei sam lwgnyez, couh soemh fwn haeuj bya soengq yijyih bae hawj Daegvang. Byawz rox, Daegvang dauqfanj daj roen iq bae ranz lo. Daegvang dauqranz mbouj raen yah de, laihnaez de haengjdingh hix gig vaiq couh dauqma.

Daegvang caj baenz aen cungdaez hix mbouj raen yah de dauqma, ndawsim cij roxnyinh saeh mbouj ndei lo. De yousim dangqmaz, sikhaek cung haeuj ndawfwn bae seiqlengq ra yah de.

Mwh de youq laj bangxdar ra raen yah de byanj laemx daimaenz seiz, de simsenz yaek rueg lwed bae!

Fwn hung lienz doek sam ngoenz sam hwnz, mehyah deng sieng hix ninz youq yihsen sam ngoenz sam hwnz. Ngoenz daihseiq, fwn menhmenh iq lo, mehyah de cij menhmenh singjsak gvaqdaeuq.

Mboengq saedceij haenx, Daegvang youq ndawsingz yihsen haeujsim dajleix yah de, daxmeh youq lajmbanj bang daiq lwgnyez. Hoeng, gyoengq lwgnyez ngoenzngoengz daejsebseb yaek ra daxmeh, hawj Daegvang simlig naetnaiq engq sinhoj lo.

Mizseiz, de baeg lai, saedcaih dingj mbouj ndaej, cij boemz youq henz mbonq yah de laepda yietnaiq yaep ndeu.

Mehyah ok yen le, gaswix vej lo. Yawj geij laeq lwgnyez ngoenz doek ngoenz majhung, yah de roxnyinh swihgeij nangq hoj ndawranz lo. Ndigah, simcingz de yied daeuq yied fanz, vah hix noix gangj lo, cingsaenz gig mbouj ndei…… Ndaw gyanghongh gij sing riu hix noix raen lo.

Daegvang ngoenznaengz hwnj bya bae gvat iengcoengz, sou batgak, roengzrengz ra di cienz ciengxgya, gig noix miz seizgan caeuq lwgnyez ganggoj guhcaemz. Daegvang mbouj lau gwn haemzhoj, de lau yah de siengj mbouj hai, engq lau lwg iq……

Song bi gvaqbae, gyoengq lwgnyez majhung lo, gaengq daengz seiz doegsaw lo, hoeng, aenvih bae hagdangz loh gyae, mbouj miz vnz ciepsongq, ndigah, sam lwgnyez cungj lij caengz ndaej hwnj hagdangz gvaq.

Aenvih ranz ndeu gag youq ndawbya ndawlueg nanz lai, mbouj ndaej caeuq bouxwnq ganggoj lai, sam lwgnyez cij rox gangj Vahcuengh

caeuq Vahyauzcuz bonjdieg, gig lau raen vnz najmoq. Baez miz vnz daeuq couh ndoj haeuj laeng bakdou bae, daj gehdou caeg liuq. Raen geij boux lwg baenz neix, Daegvang sim' in dangqmaz.

Roek

Cig daengz bi 2017, guekgya cienzmienh saedhengz gij hong banggungz. Ndawyienh anbaiz haujlai ganbu roengz gak aen yanghcin Mbanjcuengh Mbanjyauz bae dang daih'it suhgi, cijdauz caeuq bangcoh gyoengq vnzmbanj gungzhoj duetgungz bienq fouq.

Daxmeh daegvang ndang canz, mehyah de baenz bingh, lij miz sam boux lwgnyez, baengh de boux he guh hong reihnaz ciengxbak, ndigah de dwg ranzgungzhoj. Boux bangfuz ganbu de dwg Laujcangh.

“Banggungz sien rex ceiq gonq, banggungz bietdingh rex gvai” neix dwg gij vah Laujcangh ciengzseiz venj youq henz bak. Laujcangh bingzciengz gunghcoz gig nyaengq, hoeng gij hong fuzbinz de yaep ndeu hix mbouj cuengqsoeng gvaq.

De ngoenznaengz gyanghaemh gig caeux cij rag aen ndang naet de maranz, haeuj ranz seiz, baihrog gaengq mbwnlaep lo. De vut daeh roengz sahfaz bae, baez naengh ndang couh unq ndaej mbouj siengj doenghdanh. Mehyah de lau de ndangdaej nanz dingj gij hong baenz naek, ciengzseiz daengq de: “Mwngz baenz buekmingh guhhong, aeu haeujsim ndangdaej cijndaej bw!” De cungj riu han: “W, w, gou rox.” Gangj liux de youh laebdaeb ngeixnaemj gij saeh baenzlawz bangfuz ranz Daegvang.

“Aeu siengj banhfap bang de ra cienz hwnq ranz gonq, caiq bang soengq geij lwgnyez de bae doegsaw……” Laujcangh ndawuk baengq mbouj dingz.

Laujcangh sien bang sam boux lwgnyez Daegvang ra hagdangz ndawsingz bae hwnjhag, gwn youq cungj youq hagdangz. Daengz singhgiz haj banhaemh cij dauqma ranz. Gij saeh lwgnyez Daegvang yousim de gajgez lo.

Laujcangh lij bang mehyah Daegvang lienzhaeh canzlenz ndawyienh aeu ndaej eijloek daeuq naengh, fuengbienh yah de haeujok. Cwngfuj

hawj Daegvang cienz daeuq hwnq ranz moq le, Laujcangh youh bang cingj gisuzyen son Daegvang youq laj ndoengfaex ciengx gaeq……

Couh yienghneix, ginggvaq Laujcangh geij bi caenhsim bangfuz, ranz Daegvang mboujdanh ndaej duetgungz, vanzlij yied gvaq yied vuengh dem.

Saedsaeh, neix couhwdg aen ngaeuksuk daengx guek gak dieg duetgungz baenz fouq ndeu. Gij hong duetgungz bienq fouq daengx guek raeuz mboujdanh guh ndaej netsaed, caemhcaiq guh ndaej gig miz cingzyauq.

Bi 2020, guek raeuz caen guh daengz cienzmienh duetgungz lo. Hoeng, Siz Ginbingz cungsihgi naeuz: “Gak boux beixnuengx duetgungz cij dwg saedceij vuenyungz yamq daih'it, neix engq dwg giz dieg hwnjdin swngghoz moq, buekguh moq raeuz.” Ndigah, youq laj cwngcwz ndei aen dangj caeuq guek raeuz, daengx guek youq gwnz giekdaj cienzmienh hwnq baenz siujgangh sevei, cungj cingq daihlig doicaenh gij hong saenqhwnq lajmbanj. Gij saedceij lwgminz Bouxgun, Bouxcuengh, Yauzcuz daengj gak minzcuz engq vuenyungz lo.

Yah Daegvang raen saedceij yied gvaq yied miz muengh, de couh caeuq Daegvang caez youq ndawranz guh “nungzyahloz”, vanzlij hai aen bouq gai huq ndeu dem. Yienghneix bouxvunz youq ndawranz miz saeh guh, ndawranz hix ndaej demsou.

Daegvang angqfwngfwng laebdaeb hai ci rag huq. De itloh doq ngeix hoj siengj van, doq hai soujgih dingq sinhvwnz——

“Saedhengz saenqhwnq lajmbanj doxdaeuq, guek raeuz gizgiz gingjsaek hwnqfwdfwd: Baenz aen baenz aen canjyez fazcanj hoenghhwd yienh okdaeuq; baenz diuz baenz diuz loh suijniz doeng haeuj gak dieg gak mbanj bae; baenz aen baenz aen ranzlaeuz yienghmoq miz minzcuz daegsaek lumj fwncin gvaq rangz nyaz nei ndonj hwnjdaeuq! Hoeng, beij gij gingjsaek neix engq gyaundeiswhgeij dwg gij lwgda siengj hag doxgaiq lwgnyez youq ndaw hagdangz…… Daengx guek lwgminz gak minzcuz lajmbanj raeuz gaengq vuenh ndokndang lo, gij va vuenyungz cingq hai rim seiqlengq, lwenq da ronghsag!” (2 sat)